



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • BROJ: 38 • MJESEC: JUNI/LIPANJ 2012. • BILTEN JE BESPLATAN • TIRAŽ 500



**Sretan Vam 21. juni,
Dan općine Srebrenik**

Foto: Nedim Mujčinović

SADRŽAJ

- 2 Obilježen 9. maj, Dan pobjede nad fašizmom
- 3 Obilježene 20.godišnjice formiranja ARBiH i Dobrovoljačke čete
- 4 40. i 41. sjednica OV-a Srebrenik
- 5 42. i 43. sjednica OV-a Srebrenik
- 6 Otkrivena spomen ploča o izgradnji „Putu spasa „
- 7 Uskoro odjeljenja fakulteta Sarajevskog Univerziteta u Brčkom; 20.godina Merhameta
- 8 Potpisan ugovor o zajmu za zgradu Općine; Amir Husarić, novi predsjednik LDS BiH
- 9 Ugovor o izgradnji zgrade za djecu sa posebnim potrebama; Najave programa za Dan pobjele i Dan općine
- 10 Sastanak o Corn Flipsu; Menadžer Općine za 2011.g.
- 11 22.maj, Dan policije TK-a
- 12 Poster OFK Gradina
- 13 Poster OFK Gradina
- 14 GTS gostovao u Prizrenu; Aktivnosti mladih Srebrenika
- 15 Promocija knjige te slika i skulptura Muje Bjelića;
- 16 Sjećanje na Ešrefa Berbića; Manifestacija „Majski cvijet 2012“
- 17 JZU Dom zdravlja Srebrenik pobjednik Medicinijade 2012; Kotlićijada 2012
- 18 Uzgoj kornišona u Srebreniku; Nevrijeme pogodilo Srebrenik
- 19 Matura učenika MSŠ Srebrenik i Dan Prve OŠ Srebrenik
- 20 KK Gradina 3 u A1 ligi BiH; Skupština Sportskog saveza
- 21 NK Frankopan i juniori Gradine pobjednici Općinskog kupa; Kantonalni karate turnir; KK Gradina prva na turniru u Odžaku
- 22 3. internacionalni karate kup; Završen Silver Ball 2012
- 23 Naši osnovci na Kids festivalu; Aktivnosti tima na prevenciji maloljetničkog prestupništva
- 24 OFK Gradina novi premijer-ligaš



Polaganje cvijeća na Centralno spomen-obilježje

U Srebreniku obilježen 9. maj, Dan pobjede nad fašizmom

Dan pobjede nad fašizmom, koji se u svijetu slavi 9. maja, svečano je obilježen i u Srebreniku. Nakon što je položeno cvijeće na Centralno spomen-obilježje na Trgu Alije Izetbegovića i na Spomen-kosturnicu, u Plavoj sali Doma kulture, uslijedila je svečana sjednica Općinskog vijeća(OV). Prisutnima se prvo obratio predsjedavajući OV-a Srebrenik Ibrahim Zukić koji je podsjetio da se isti dan obilježava i kao Dan Evrope i kao Dan Zlatnih ljiljana, što je svojevrsna simbolika, obzirom da su se naši nabolji sinovi i kćeri u odbrambeno-oslobodilačkom ratu 1992-1995.g., toliko godina nakon 1945. g., borili protiv preživjelog fašizma i na ovim našim prostorima. –„Da je fašizam, nažalost, i dalje živ i da nije pobijeđen, govori i podatak o procesu rehabilitacije



Počast je odata i poginulim borcima NOR-a

fašista u okruženju. Proces rehabilitacije vođe četničkog pokreta Dragoljuba Draže Mihailovića u Srbiji predstavlja najgrublji oblik falsifikovanja historijskih činjenica, te ideološko-političku reviziju historije. Ovom rehabilitacijom, nakon koje će logično slijediti zahtjevi za rehabilitaciju i ostalih fašista sa prostora bivše Jugoslavije, legalizovati će se zlo-



Obraćanje Zukić Ibrahima

čini, iskriviti historija te od zločinaca načiniti žrtve.”-istakao je Zukić. U nastavku sjednice, prigodnim recitalom, nastupili su učenici MSŠ Srebrenik, nakon čega je referat povodom 9. maja, Dana pobjede nad fašizmom, podnio općinski načelnik Mehmed Bajrektarević, koji je između ostalog istakao: –„Fašizam je poput korova – on raste tamo gdje mu je pogodno tlo, a pogodno tlo za fašizam su slaba država i slaba privrženost građana toj državi. Korov, kako znamo, moramo stalno iznova uništavati jer je veoma otporan, te tako moramo postupati i prema pojavama fašizma na ovim prostorima. Zlo fašizma teško može zauvijek biti poraženo, ali svakako da se protiv njega trebamo boriti na svakom koraku.” –„Ovo je vrijeme teških krivotvorenja historije i fašizma iz perioda Drugog svjetskog rata. No time neće biti poništeno zlo koje su fašisti izazvali, predvodili, legitimirali i simbolizirali”-istakao je, između ostalog, predsjednik Udruženja antifašista Srebrenik Ilić Vlado. U nastavku su učenici Prve osnovne škole Srebrenik, recitacijama podsjetili na ono što su fašisti radili tokom proteklih desetljeća.

Obilježena 20. godišnjica formiranja Štaba TO Srebrenik

Prigodnom svečanošću na platou ispred centralnog šehidskog spomen-obilježja, kojoj su prisustvovali predstavnici općinskih vlasti i boračkih udruženja s područja srebreničke općine i Tuzlanskog kantona, dana 07.04.2012.godine, obilježena je 20. godišnjica formiranja Štaba teritorijalne odbrane Srebrenik. Na aprilske dane iz 1992. godine i formiranje organiziranih odbrambenih struktura podsjetili su Mehmed Barjektarević, predsjednik ratnog Predsjedništva općine Srebrenik i Fadil Vikalo, prvi komandant Štaba TO Srebrenik. Govoreći o svijetloj tradiciji odbrane BiH i očuvanja civilizacijskih tekovina suživota tri naroda na području ove općine, Barjektarević i Vikalo su posebno naglasili da je, zahvaljujući blagovremenom formiranju Štaba TO i stavljanju svih naoružanih jedinica pod jedinstvenu komandu, Srebrenik već u junu 1992. godine bio jedna od rijetkih općina u BiH čiju kompletnu teritoriju kontrolišu legalni organi vlasti. U sklopu obilježavanja 20. godišnjice formiranja Štaba TO Srebrenik, predstavnici općinskih vlasti i boračkih udruženja položili

su cvijeće na centralni spomenik šehidima i poginulim borcima u proteklom odbrambeno-oslobodilačkom ratu. Nakon toga u planinarskom domu na Lipicima, na samom vrhu planine Majevica, organizirano je tradicionalno druženje domaćina i njihovih gostiju iz brojnih boračkih udruženja s područja TK-a.



Detalj sa proslave 20.godišnjice formiranja Štaba TO Srebrenik

Obilježena 20.godišnjica formiranja Armije RBiH i Dobrovoljačke čete

U okviru obilježavanja 20. godišnjice formiranja Armije RBiH, sredinom aprila 2012.g., u prostorijama Doma kulture u Srebreniku, održana je svečana akademija kojoj su prisustvovali predstavnici općinskih vlasti, boračkih udruženja, privrednih kolektiva i javnih ustanova i preduzeća s područja ove općine. O nastanku Armije RBiH i njenom doprinosu oslobođenju naše države, na svečanoj akademiji su govorili Faruk Vikalo, pomoćnik načelnika općine Srebrenik i Abdurahman Fazlić, ratni komandant 212. brdske brigade Srebrenik. Govoreći o sudbonosnim događajima u BiH u periodu od 1992. do 1995. godine, Fazlić je podsjetio i na pripreme za odbranu od oružane agresije i formiranje prvih vojnih jedinica na području ove općine, zahvaljujući kojima je Srebrenik već u junu 1992. godine bio jedna od rijetkih općina u BiH čija je kompletna teritorija bila slobodna. Učesnicima svečane akademije prikazan je i dokumentarni film grupe učenika Druge osnovne škole Srebrenik „Večeras ćemo za njih voljeti“, posvećen 228 šehida i poginulih boraca s područja ove općine. Ovom prilikom je položeno cvijeće na centralno spomen-obilježje na gradskom šetalištu i spomen-kosturnicu u gradskom parku. Postrojavanjem na gradskom šetalištu bivših boraca Dobrovoljačke čete, u subotu je na prigodan način obilježena i 20. godišnjica formiranja jedne od najelitnijih jedinica na



Obilježena je i 20.godišnjica formiranja Dobrovoljačke čete

području srebreničke općine u proteklom odbrambeno-oslobodilačkom ratu. Kako je istakao jedan od osnivača ove jedinice Fadil Duranović, Dobrovoljačka četa formirana je polovinom aprila 1992. godine od patriota spremnih da žrtvuju svoje živote za odbranu svog naroda, države i identiteta. Na prvom postrojavanju okupilo se oko 100 dobrovoljaca koji su, uglavnom vlastitim sredstvima, sebi kupili naoružanje i opremu, a u tim prelomnim trenucima za sudbinu BiH bila je jedna od rijetkih jedinica koja je imala školovan kompletan starješinski kadar na čelu s prvim komandirima Saferom Ahmetovićem. Sve do septembra 1992. godine djelovala je kao samostalna dobrovoljačka jedinica, a formiranjem 21. srebreničke brigade ušla je u sastav Trećeg bataljona, gdje je sve do kraja rata važila za jednu od najpouzdanijih četa. Nakon što je položeno cvijeće na centralno spomen-obilježje šehidima i poginulim borcima, u planinarskom domu „Lipici“ upriličeno druženje bivših pripadnika ove jedinice i njihovih gostiju.

Izvještaj sa 40. sjednice OV-a Srebrenik

Predstavnici Zakonodavne vlasti Općine Srebrenik su na 40. sjednici OV, održanoj 28.03.2012.godine, usvojili budžet Općine Srebrenik za 2012. godinu u iznosu od 12.147.021,17 KM. U obrazloženju prijedloga Odluke o budžetu, koji je veći u odnosu na prošlu godinu, istaknuto je da će isti, i pored krize u državi, biti razvojni, s obzirom da je planirano u ovoj godini da se uradi nekoliko značajnih infrastrukturnih projekata. U budžetu su napravljene i određene uštede tako da će svim uposlenicima organa uprave općine Srebrenik plaće biti umanjene za 5%, na materijalnim troškovima će se uštediti 10%, dok su i pojedinim javnim ustanovama umanjena izdvajanja, a umanjena nije bilo jedino prema socijalnim izdvajanjima, boračkim populacijama, komisijama OV.... Vrijedi istaći i da je izdvojeno 100.000 KM za upošljavanje mladih. Načelnik Mehmed Bajrektarević je istakao da će akcenat ove godine biti na izgradnji nove zgrade Općine, nastavku radova na toplifikaciji te rješavanju problema vodosnabdijevanja. U nastavku sjednice usvojen je i Program izgradnje infrastrukture na području općine Srebrenik za 2012.g., za šta je predviđeno da se izdvoji više od 5 miliona KM, kao i Izvještaj o izvršenju budžeta Općine za 2011.g., koji je realizovan u blagom suficitu u iznosu od 7.000 KM. Uz usvojeni Izvještaj o izvršenom popisu sredstava vijećnici su prihvatili i Program uređenja gradskog građevinskog zemljišta u šta se planira investirati 3.230.000 KM, dok je usvojena i Odluka o prosječnoj



Detalj sa 40. sjednice Općinskog vijeća Srebrenik

konačnoj građevinskoj cijeni 1 metra kvadratnog korisne stambene površine u iznosu od 920 KM. Dosta polemike izazvala je Odluka o korištenju javnih površina, u kojoj stoji da oni koji plaćaju veću naknadu od 500 KM da to mogu izvršiti u mjesečnim ratama, a da prije podnošenja zahtjeva za novu sezonu, moraju izmiriti prethodna dugovanja. Nakon višemjesečnog rada na Pravilniku o organizaciji i održavanju javnih parkinga, usvojena je i ova Odluka kao i cjenovnik usluga. Naplata će se vršiti u dvije zone i to za II zonu plaćat će se 0,50 KM/h, dnevno 4 KM, mjesečno 15 KM a godišnje 150 KM, dok će se u I zoni plaćati sat 1 KM, dnevno 5 KM, mjesečno 20 KM a godišnje 200 KM. Stanari će plaćati godišnju kartu u I zoni 150 KM a u II

zoni 80 KM. Dok se ne nabave i ugrade savremeni parking aparati, vršiće se naplata parkinga na dosadašnji način. Dosta zanimanja izazvala je i Informacija o toplifikaciji grada Srebrenika (I faza), u šta će se investirati 1.400.000 KM. Ovo je inače jedinstvena vrsta toplifikacije u BiH sa više mini-toplana na bio-masu, gdje će prva biti instalirana u kotlovnici kod „MSŠ“ Srebrenik. Vijećnici su usvojili i Izvještaj o radu Općinskog načelnika za 2011. g., kao i Informaciju o odnosima između Općine Srebrenik i d.d. „Gradski i prigradski saobraćaj“ Tuzla, dok je sa dnevnog reda skinuta tačka o izmjenama i dopunama Odluke o komunalnim taksama.

Izvještaj sa 41. sjednice OV-a Srebrenik



Detalj sa 41. sjednice Općinskog vijeća Srebrenik

Izvještaji gotovo svih javnih ustanova koji su trebali da se razmatraju na 41. sjednici Općinskog vijeća Srebrenik, koja je održana dana 25.04.2012. godine, su skinuti s Dnevnog reda, pa će se razmatrati na sljedećoj sjednici OV sredinom maja. Ipak, razmatran je Izvještaj Sportskog saveza te Općinskog pravobranilaštva u kojem je, između ostalog, naglašeno da Općina potražuje blizu 400.000 KM, dok se od

nje potražuje blizu 2 miliona KM, ali je pravobranilac istakao da su to uglavnom nerealni zahtjevi, koji će se teško realizovati. U Izvještaju o radu boračkih organizacija istaknuto je kako se, prilikom upošljavanja u javne ustanove i preduzeća, mora više voditi brige o pripadnicima iz reda ove populacije te im se davati prioritet. U Informaciji o radu inspeksijskih organa istaknuto je da ima nekoliko upražnjenih radnih mjesta, zbog čega je donesen zaključak da se u naredna dva mjeseca dostavi nova Informacija sa opširnijim informacijama u radu istih. U Izvještaju o radu Komisije za utvrđivanje prometne vrijednosti, nepokretnosti i prava istaknuto je kako se od poreza na promet nepokretnosti ubralo 467.541,57 KM. Vijećnici su prihvatili da se iz budžetske rezerve izdvoje dodatna sredstva za pripravnike i volontere, kako bi mladi ljudi kroz obavljanje volonterskog i pripravnčkog staža stekli uslove za polaganje stručnog ispita odn. bolje uslove da dođu do posla. Prihvaćeni su i prijedlozi da u Komisiju za koncesije TK, kao dva kooptirajuća člana, uđu Ramiz Salihbašić i Zijo Nurikić, dok je prihvaćeno da se JU „Centar za kulturu i informisanje“ Srebrenik dodijeli na upravljanje „Antenski stub“ na Majevici, čime će ova Ustanova povećati vlastite prihode. Vijećnici su izglasali i Prijedlog odluke o utvrđivanju broja općinskih priznanja i stimulativnih mjera koje se dodjeljuju za Dan općine, kao i izmjene odluke o osnivanju MZ Preville, te dopune o osnivanju MZ Podorašje.

Izvještaj sa 42. sjednice OV-a Srebrenik

Na 42. sjednici Općinskog vijeća Srebrenik, koja je održana 16. maja 2012. godine, najviše se raspravljalo o izvještajima javnih ustanova i preduzeća. Nakon burne diskusije, na kraju, jedino nije usvojen Izvještaj JU „Sportsko-rekreativni centar“ Srebrenik, dok su ostali, uz manje ili više sugestija, ipak usvojeni. Dosta pažnje se posvetilo i Informaciji o radu Općinskog suda u Gradačcu, gdje je naglašeno kako se moraju poduzeti veće aktivnosti za vraćanje Suda u Srebrenik. Ova procedura je trenutno u Parlamentu FBiH, i za očekivati je kako će se postići dogovor sa Visokim sudskim i tužilačkim vijećem, kako bi se ponovo vratio Sud u Srebrenik. O Izvještaju JU „Centar za socijalni rad“, zatim „Ustanove za odgoj i obrazovanje“, „Narodni univerzitet“ i „Veterinarske stanice“ nije se gotovo ništa raspravljalo i oni su usvojeni bez ikakvih pitanja vijećnika. S druge strane o Izvještaju JZU „Dom zdravlja“ istaknuto je da pružanje usluga može biti još bolje, te da se pokuša ulaz Hitne pomoći izgraditi s druge strane. U Izvještaju JU „Centar za kulturu i informisanje“ vijećnici su predlagali preustroj ove Ustanove u smislu od-



Detalj sa 42. sjednice Općinskog vijeća Srebrenik

vajanja Radija od Ustanove, kao i prijedlozi o osnivanju Radija i televizije Srebrenik. Ipak, najveću raspravu izazvao je Izvještaj o radu JZU „Gradska apoteka“, gdje su, u istupima pojedinih vijećnika, istaknuta izuzetno visoka primanja, posebno direktorice kao i ostalih uposlenika, koja bi se trebala smanjiti, kao i da mora biti prika-

zana znatno veća dobit na kraju godine, obzirom da je riječ o klasičnoj trgovini sa izuzetno visokom maržom, koja se obračunava na lijekove. Tačka o nacrtu Zakona o izmjenama i dopunama Zakona o RTV TK također je usvojen, dok je tačka o osnivanju MZ Sječe skinuta s dnevnog reda.

Izvještaj sa 43. sjednice OV-a Srebrenik

Na 43. sjednici Općinskog vijeća Srebrenik, koja je održana u srijedu 06.06.2012.godine, zbog obimnog Dnevnog reda, usvojeno je svega sedam tačaka, od kojih je najveću pažnju izazvao Nacrt Elaborata o organizacionom umrežavanju ustanova osnovnog i srednjeg obrazovanja, koji je jednoglasno odbijen te se smatra neprihvatljivim, pa će se kao takav uputiti Vladi TK odnosno Ministarstvu obrazovanja TK. Vijećnici smatraju da je nedopustivo ukidanje pojedinih područnih škola poput onih u Gornjim Hrgovima, Lušnici i Jasenici...zbog čega su i odlučili da se usprotive ovakvom Nacrtu Elaborata, što su nedavno uradili i vijećnici u Gračanici. Dosta polemike je izazvala i tačka koja se odnosi na dodjelu Općinskih priznanja, tako da je, nakon burne diskusije, odlučeno da se umjesto pet dodijele četiri Plakete i to: OFK „Gradina“ za ulazak u Premijer ligu BiH, zatim d.o.o. „Aksemtont“ za razvoj privrede, ef. Osmanu Mujiću za doprinos u humanitarnom radu i Delić Nedžad za doprinos u razvoju sporta i infrastrukture na području MZ Kiseljak. Četiri Povelje dodijelit će se: Fehimi Cviko iz Špionice, Ekremu Imširoviću iz Dubokog Potoka, Hajriji Mehić iz Rapatnice i Fahrudin Selimoviću iz Seone, dok je Humanistom godine proglašen Fahir Zukić-Butro, a ne Omer Čeliković, kako je to Komisija predložila. Zahvalnice će se dodijeliti: Ansamblu „Zefir“, Hasanu Čauševiću iz Srebrenika, Mensuru Keriću iz Špionice, Zuhdiji Moranjkić iz Donjih Moranjaka, Raifu Mrkaljeviću iz Podorašja, Čazimu Sadikoviću iz Caga, Nedžad Zahiropoviću iz Ljenobuda te Nirmelu Muratoviću iz Previla. Novčane nagrade pripast će: Admiru Junuzoviću iz Kiseljaka, Muameru Kavazoviću iz Podorašja, Adisu Mašiću iz Brda, Almiri Mujačević iz Tinje, Emiru Muratoviću iz Srebrenika te Mirheti Omerović iz Bjelava. Donesena je i Odluka o dodjeli posebnog priznanja - počasnog građanina/gradanke općine Srebrenik, koje će ove godine biti uručeno bošnjačkoj heroini Fati Orlović iz Konjević Polja, koja često boravi



Detalj sa 43. sjednice OV-a Srebrenik

i na području općine Srebrenik, kao i Odluka o oduzimanju statusa nepokretnosti u općoj upotrebi u MZ Kiseljak na zahtjev Stajić Senahide kćeri Džafera. Vijećnici su sa oduševljenjem prihvatili i Izvod iz studija izvodljivosti za dodatne količine pitke vode za mjesna područja Tinju i Podorašje, koja bi se u skorije vrijeme trebala spojiti na Gradski vodovod i time kvalitetno riješiti vodosnadbijevanje blizu 4.000 novih korisnika. S obzirom na obiman Dnevni red, koji je dogovorom na Kolegiju stranaka povećan sa prvobitnih 17 tačaka na čak 26, 43. sjednica OV-a Srebrenik, nastaviti će se u narednu srijedu, 13. juna u 11 sati.

Otkrivena spomen ploča koja svjedoči o izgradnji Puta spasa na Majevidi

Dana 12.05.2012.godine, pred oko 400 posjetilaca, otkrivena je spomen ploča koja svjedoči o izgradnji „Put spasa“, koji je imao ogromnu važnost tokom proteklog odbrambeno-oslobodilačkog rata. Navedenu spomen ploču svečano su otkrili predstavnici Općine Srebrenik i koordinacije boračkih udruženja Brčko DC, a upriličeno je i svečano polaganje cvijeća. Uz predstavnike boračkih udruženja ovoj manifestaciji prisustvovali su i članovi planinarskih društava Srebrenika, Brčkog i Konjuha iz Tuzle te brčanskih osnovnih škola. Samo obilježavanje i postavljanje spomen ploče je prva faza spomen centra koji će biti izgrađen na ovoj lokaciji, a izgradnja spomen ploče koštala je 4.000 KM. Načelnik općine Srebrenik Mehmed Bajrektarević, koji je istu funkciju obnašao i u ratnom periodu,



između ostalog je rekao da je ovo bio jedini način da se pomogne Brčacima koji su bili u potpunom okruženju i da su svi zajednički prva tri mjeseca radili maksimalno, naročito prvih tridesetak dana, u jako teškim uslovima, kako bi prosjekli ovaj put, kojim je spašen život mnogih ranjenika, iskreno priznajući da je, zbog tadašnje loše komunikacije, veliki broj ranjenika, nažalost, izgubio živote probijajući se kroz blato i majevičke šume. Govoreći o ovom trenutku Zehrudin Mustafić, tadašnji načelnik štaba Teritorijalne odbrane Srebrenik, kazao je da se zajedništvo između općina Brčko i Srebrenik potvrđuje i kroz ovaj put, te da svi moramo učiniti više kako bi on ostao trajna uspomena, naročito mladim generacijama, kako se ono što se dešavalo u periodu od 1992. do 1995. godine ne bi zaboravilo i nikome ne bi ponovilo. U ime Vlade Brčko distrikta tročlana delegacija u sastavu ministar Esed Kadrić,



Detalj sa polaganja cvijeća na spomen ploču

Slavko Matanović i Zekerijah Osmić, pozdravili su sve prisutne i zahvalili se na nesebičnoj pomoći građana Srebrenika i cijele općine koji su u to najteže vrijeme pružili sve od sebe, ne samo kroz izgradnju ove putne dionice u dužini od 9 km, već i kroz sve ono što je uz to išlo kada je riječ o pomoći ranjenicima. U ime koordinacije boračkih udruženja Brčko distrikta BiH obratio se ratni komandant Inženjerskog bataljona 108/215. Viteške motorizovane brigade Brčko, Kurtalić Mehmedalija, ističući značaj ovog puta u samom začetku ratnih sukoba, način izgradnje kao i značaj ovog spomen obilježja. Zekerijah Osmić, koji se prisutnima obratio u ime Vlade Brčko distrikta, još jednom je podsjetio da će izgradnja spomen obilježja trajati i u narednom periodu i da će općina Srebrenik i Brčko distrikt svojim sredstvima napraviti značajnije objekte na ovom putu kako bi ovo bila i turistička, ali i historijska atrakcija, navodeći i da je „Put spasa“ projektovao jedan od najboljih arhitekata u Brčkom i okolini, rahmetli Hamed Jerković. Program manifestacije nastavljen je u Majevičkoj kući u kojoj je, uz vojnički grah za sve prisutne, nastavljeno druženje. Na kraju su svi oni koji su bili na otvaranju spomen ploče, prema tradiciji, pješačenjem prošli cijelu dionicu "Put spasa" od Okresanice do MZ Rašljani.



Detalj sa svečanosti

Uskoro otvaranje odjeljenja nekoliko fakulteta Sarajevskog Univerziteta u Brčkom

Dana 09.05.2012.godine, općinu Srebrenik je posjetila delegacija Sarajevskog Univerziteta, na čelu sa rektorom prof. dr. Čaklovica Farukom. U delegaciji su bili još i prof. dr. Mirsad Kurtović -dekan Poljoprivredno prehranbanog fakulteta, prof. dr. Uzeir Bavčić-dekan Pedagoškog fakulteta, prof. dr. Rifat Škrijelj-dekan Prirodno matematičkog fakulteta i doc. Dr. Edin Halapić-prodekan Pravnog fakulteta. Uvažene goste je u svom kabinetu primio načelnik općine Srebrenik g-din Mehmed Bajrektarević, zajedno sa svojim najbližim saradnicima. Rektor Čaklovica je načelnika upoznao sa procesom oko skorog otvaranja odjeljenja Sarajevskog Univerziteta u Brčko DC BiH sa fakultetima čiji su dekani - predstavnici članovi njegove delegacije. Ova delegacija je istog dana bila i u posjeti Brčko DC BiH, gdje su sa nadležnima razgovarali o ovoj temi, u nadi da će prvi studenti već ove godine biti upisani na navedene fakultete u Brčkom. Ova ideja je naišla na razumijevanje i odobravanje svih prisutnih jer će to biti od velike pomoći i za naš kraj zbog velikog broja studenata koji tradicionalno već decenijama odlaze na studije u Sara-



Delegacija Sarajevskog Univerziteta u Srebreniku

jevo. Sada bi to bilo puno jednostavnije, bliže i jeftinije, zbog same blizine Brčkog. Načelnik Bajrektarević se gostima zahvalio na dolasku te im

uručio prigodne poklone, poznatu srebreničku Povelju bosanskog Bana Stjepana II Kotromanića.

Obilježena 20. godišnjica formiranja podružnice Merhameta u Srebreniku

Dana 24.04.2012.godine, u plavoj sali Doma kulture u Srebreniku, održana je svečana proširena sjednica Skupštine MDD „Merhamet“ Srebrenik, kojom je na prigodan način obilježena 20. godišnjica formiranja podružnice ovog dobrotvornog društva u Srebreniku. Sjednici su prisustvovali i predstavnici boračkih udruženja, općinskih vlasti, vjerskih zajednica, privrednih kolektiva te javnih ustanova i preduzeća s područja općine Srebrenik i TK-a. -„Krajem aprila 1992. godine grupa humanih ljudi koji u ratnom vihoru više nisu mogli mirno posmatrati izbjeglice i nemoćne kako idu od vrata do vrata i mole za pomoć, odlučila je da i u Srebreniku formira dobrotvorno društvo Merhamet. Zajedno s ostalim strukturama civilne vlasti, u najtežim ratnim vremenima konstruirano smo pružali pomoć za oko 25.000 prognanika koji su u Srebreniku našli utočište, ali i velikom broju gladnih stanovnika ove općine, bez obzira na njihovu nacionalnu i vjersku pripadnost“, istakao je Osman ef. Mujić, predsjednik



Plaketu Merhameta dobio je i načelnik Bajrektarević



Detalj sa Skupštine MDD Merhamet Srebrenik

Općinskog odbora Muslimanskog dobrotvornog društva „Merhamet“ Srebrenik. Učesnicima svečane akademije obratili su se i Mehmed Barjektarević, načelnik općine Srebrenik, Refik ef. Hodžić, glavni imam Međzisa IZ Srebrenik, Bekir ef. Šabić, izaslanik muftije tuzlanskog, Adil ef. Pezerović, predsjednik Regionalnog odbora Merhameta Tuzla i Hajrudin Šahić, predsjednik Merhameta BiH. Istaknutim pojedincima i kolektivima koji su u proteklih 20 godina pomagali rad ovog dobrotvornog društva uručene su zlatne i srebrne plakete, te plakete humanosti. U sklopu manifestacije predstavljena je i knjiga o 20. godišnjem radu MDD „Merhamet“ Srebrenik. Nakon svečane akademije, domaćini i njihovi gosti učenjem fatihe ispred centralnog spomen-obilježja u gradskom centru Srebrenika odali su počast šehidima s područja srebreničke općine.

Načelnik Bajrektarević prisustvovao potpisivanju Ugovora o zajmu i otvorenju Sarajevo Biznis Foruma



Detalj sa potpisivanja Ugovora o zajmu

Načelnik općine Srebrenik Mehmed Bajrektarević sa saradnicima, je dana 17.05.2012.godine u 11 sati, u zgradi Parlamenta BiH, prisustvovao potpisivanju Ugovora o zajmu između BiH i Saudijske Arabije-Saudijskog fonda za razvoj. Ugovor su potpisali zamjenik predsjedavajućeg Vijeća ministara BiH i ministar finansija i trezora Nikola Špirić i predstavnik Saudijskog fonda za razvoj Mohammad Alarifi. Tim ugovorom će biti osigurano 18 miliona dolara (oko 25 miliona KM) za povratak izbjeglica u BiH odn. za obnovu oko 1000 stambenih jedinica, a u sklopu ovog zajma su predviđena i 3 miliona dolara za izgradnju nove zgrade administracije općine Srebrenik. U kratkom razgovoru načelnik Bajrektarević se zahvalio saudijskom ambasadoru Aid Al Thakafiju i direktoru SFFD Mohammad Alarifi-ju na dosadašnjoj pomoći Saudijske Arabije Bosni i Hercegovini, istakavši kako se nada da će realizacija projekta izgradnje nove općinske zgrade u Srebreniku proteći u skladu sa planiranom dinamikom, iako je, kako je istakao, svjestan da se sama procedura javne nabavke u vezi izbora najpovoljnijeg izvođača radova realno može odužiti. Načelnik Bajrektarević je, u nastavku aktivnosti, prisustvovao i otvaranju 3. Sarajevo Biznis Foruma, na kome je općina Srebrenik predstavila dva projekta iz oblasti turizma i to: rekonstrukcija Starog grada Srebrenika i izgradnja zimsko-ljetnog sportsko rekreativnog centra na planini Majevice.

Amir Husarić iz Srebrenika, novi predsjednik LDS-a



Detalj sa 8. Kongresa LDS BiH

Krajem aprila 2012.godine u Domu kulture u Srebreniku, održan je 8. Kongres Liberalno demokratske stranke Bosne i Hercegovine. Kongresu su pored delegata koji su pristigli iz cijele Bosne i Hercegovine, prisustvovali i istaknuti gosti, političari iz regiona kao što su: Jelko Kacin, poslanik u evropskom parlamentu, dr. Božidar Flajšman, potpredsjednik Liberalne demokracije Slovenije i predstavnici Liberalne partije Crne Gore, kao i brojni drugi ugledni gosti iz BiH. Na Kongresu, koji je bio izvještajno izbornog karaktera, usvojene su određene izmjene Statuta Liberalno demokratske stranke, Programska izjava, kao i šest Rezolucija. Kako je rečeno na Kongresu, stranka će nastaviti utvrđenim putem, a posebno će se zalagati za brži put ka Evropskoj uniji. Kongres je izabrao i novo rukovodstvo Liberalno demokratske stranke tako da je novi predsjednik LDS BiH, Amir Husarić iz Srebrenika, koji je na ovoj funkciji zamijenio Bojana Zeca Filipovića, dok su za



Amir Husarić, novi predsjednik LDS-a

potpredsjednike izabrani: Daliborka Milović, Hasib Salkić i Zlatko Hurtić. Ovim izborom ukazano je veliko priznanje prije svega Amiru Husariću, dugogodišnjem istaknutom vijećniku u Općinskom vijeću Srebrenik, LDS-u Srebrenik ali i kompletnoj općini Srebrenik. Na marginama Kongresa vrijedi istaći sastanak gospode Jelka Kacina i dr. Božidara Fjašmana sa načelnikom općine Srebrenik Mehmedom Bajrektarevićem.

Potpisan ugovor o izgradnji zgrade „Centra za djecu sa posebnim potrebama“

Dana 08.06.2012.godine, u kabinetu općinskog načelnika Mehmeda Bajrektarevića, predstavnici Općine Srebrenik i UNDP-a potpisali su ugovor o izgradnji zgrade Centra za djecu sa posebnim potrebama na području naše općine s građevinskom firmom „Gromex“ d.o.o. Srebrenik. Vrijednost građevinskih radova je 150.000 maraka, a nova zgrada Centra za dnevni boravak djece s posebnim potrebama, prema obećanju Hazima Muratovića, direktora „Gromeksa“, bit će završena u roku od tri mjeseca. Izgradnjom nove zgrade, ukupne korisne površine oko 200 kvadratnih metara, mališani koji sada borave u skućenim prostorijama Udruženja penzionera civilnih invalida Srebrenik, imat će optimalne uslove za dnevni boravak i organiziranje raznih sadržaja usmjerenih na njihovu bržu socijalizaciju. Sredstva za izgradnju Centra za dnevni boravak djece s posebnim potrebama i njegovo opremanje osigurat će UNDP, općina Srebrenik i Ministarstvo rada i socijalne politike TK-a. Na području ove općine ima oko 150 djece s posebnim potrebama s kojima



Detalj s potpisivanja ugovora

već tri godine u neuslovnim prostorijama rade pedagozi, psiholozi i socijalni radnici Udruženja penzionera civilnih invalida Srebrenik. Ovim projektom doprinosi se socijalnoj uključenosti djece s posebnim potrebama, a pruža se i značajna pomoć njihovim roditeljima na planu osposobljavanja mališana za samostalan život.

Najava Dana otpora



Detalj sa press konferencije povodom Dana otpora 2012

„Dani otpora“, naziv je tradicionalne manifestacije kojom predstavnici boračkih udruženja općine Srebrenik u toku juna obilježavaju sve značajnije datume iz proteklog odbrambeno-oslobodilačkog rata na području ove općine. Aktivnosti u okviru ovogodišnjih „Dana otpora 2012.“ započeli su obilaskom svih šehidskih mezarja i spomen-obilježja u naseljima na području ove općine, a do kraja ovog mjeseca organizirat će se niz manifestacija kojima će se srebrenički borci podsjetiti na dane ponosa, ali i tuge zbog gubitka života njihovih saobraca. Kako je istaknuto na pres-konferenciji Koordinacije boračkih udruženja općine Srebrenik, u sklopu ove manifestacije u svim džamijama na području ove općine proučit će se tevhid, a održat će se i svečana sjednica boračkih udruženja na kojoj će se najboljim borcima i članovima njihovih porodica uručiti zaslužena priznanja. Proglasit će se i najbolji kratkometražni filmovi učenika srebreničkih osnovnih škola na temu „Kultura i tradicija u BiH“, a dana 13.06.2012.g. u 11 sati na stadionu Sloge u Špionici Centar održaće se turnir u streljaštvu iz vazdušne puške. Dana 27.06.2012.godine u Plavoj sali Doma kulture, održaće se promocija knjige „Civilna zaštita općine Srebrenik u odbrambeno-oslobodilačkom ratu 1992- 1995 g.“, autora mr. Bajre Imširovića. Sredstva je osigurala općina Srebrenik.

Program aktivnosti za 21. juni, Dan općine

PROGRAM AKTIVNOSTI OBILJEŽAVANJE 21. JUNA DANA OPĆINE SREBRENİK	
21. juni - Dan općine Srebrenik	SUBOTA 16.06.2012. godine
	10,00 sati - Osmi memorijalni šahovski turnir „Džafer Hogić“ Hotel „Park“ Srebrenik
	NEDJELJA 17.06.2012. godine
	12,00 sati - MZ Jasenica, otkrivanje šehidskog spomen obilježja u Crvenom Brdu
	PONEDJELJAK 18.06.2012. godine
	09,00 sati - Prijem kod načelnika općine Srebrenik (po posebnom programu)
	11,00 sati - Svečana sjednica boračkih organizacija Doma kulture Srebrenik
	18,00 sati - Smotra kulturnog stvaralaštva učenika MSŠ i OŠ s područja općine Srebrenik Ljetna pozornica Doma kulture
	UTORAK 19.06.2012. godine
	19,00 sati - Veče saza, sevdaha i etno muzike Ljetna pozornica Doma kulture
	SRIJEDA 20.06.2012. godine
	12,00 sati - Otvaranje vodovoda u MU Ljenobud
	19,00 sati - Super talent Srebrenik radija Ljetna pozornica Doma kulture
	ČETVRTAK 21.06.2012. godine
	10,00 sati - Polaganje cvijeća na Centralnom spomen obilježju i spomen kosturnici u gradu Srebreniku
	10,30 sati - Svečana sjednica Općinskog vijeća općine Srebrenik Doma kulture Srebrenik
	12,00 sati - Otvaranje novoizgrađene hladnjače „Voćnog rasadnika“ u Špionici
	18,00 sati - Finalna utakmica radničkih sportskih igara „Sportsko-rekreativni centar“
	20,00 sati - Koncert narodno – zabavne muzike Gradsko šetalište

Brojni razvojni projekti na čekanju zbog stečaja u preduzeću „Corn flips“ Srebrenik

Početkom maja 2012.g., u kabinetu općinskog načelnika Mehmeda Bajrektarevića, održan je radni sastanak načelnika i njegovih najbližih saradnika sa predstavnicima Ministarstva poljoprivrede, šumarstva i vodoprivrede TK-a i Poljoprivrednog zavoda TK-a, predstavnicima trgovačkog lanca „Bingo“ i menadžmenta preduzeća „Corn-flips“ Srebrenik, na kome se razgovaralo o mogućnostima organizovanog otkupa voća i povrća, razvoju stočarstva, te instaliranju postrojenja za preradu i skladištenje poljoprivrednih proizvoda na ovom općinskom području. Vlasnik Binga Džambić Senad je podsjetio na prošlogodišnju inicijativu za instaliranje hladnjače i dr. pogona, koju su pokrenuli predstavnici TC „Bingo“ zajedno s predstavnicima Corn-flipsa, a realizacijom ove ideje zaokružio bi se proces proizvodnje, otkupa, skladištenja, prerade i zagarantovanog plasmana poljoprivrednih proizvoda putem prodavnica tržnog lanca Bingo. S obzirom da je riječ o aktivnostima koje daju mogućnost upošljavanja većeg broja radno sposobnog stanovništva kroz ovaj vid poljoprivredne proizvodnje, svu neophodnu tehničku podršku je obećao i načelnik općine Srebrenik Mehmed Barjektarević. Uzimajući u obzir da se ovim projektom štiti domaća poljoprivredna proizvodnja, te potiče povećani plasman domaćih poljoprivrednih proizvoda, kroz zagarantovani otkup i osigurano tržište, nesebičnu podršku projektu, kroz prizmu podsticajnih sredstava, je obećalo i resorno kantonalno ministarstvo predvođeno ministrom Škahić Imširo m te Poljoprivredni zavod predvođen Šerifović Nusretom. Jedan od ključnih aktera prezentiranih projekata je preduzeće Corn-flips, te je predstavnik menadžmenta Husnija Avdić upoznao prisutne na najveći problem realizaciji svega navedenog a to je da se firma već oko 8 godina nalazi u stečajnom postupku,

iako su, prema iznesenom, svi dugovi plaćeni. Zbog toga je zamolio sve prisutne da lobiraju kod nadležnih da se stečajni postupak, koji se vodi kod nadležnog suda u Tuzli, što prije okonča, jer isti odavno nema nikakvog smisla. Kao pozitivan primjer lobiranja, a ne pritiska na sudstvo, je istaknut slučaj ponašanja zakonodavne i izvršne vlasti u slučaju pokretanja i okončanja stečaja u preduzeću „Granit“ u Jablanici, te je zatraženo od predstavnika Vlade TK-a i Općine da se dodatno angažuju na ubrzanom rješavanju konačnog statusa ovog preduzeća.



Detalj sa sastanka

Ramiz Karić-menadžer općine Srebrenik za 2011.g.



Najbolji menadžeri općine Srebrenik u 2012. g. sa načelnikom

U prostorijama motela „Gradina“ u Srebreniku, u petak 07.04.2012.godine, održana je svečana sjednica Upravnog odbora Udruženja privrednika općine Srebrenik, na kojoj su uručena priznanja najuspješnijim menadžerima na području ove općine za 2011. godinu. Proglašeni su najuspješniji menadžeri u pet kategorija, a prilikom izbora ključni kriteriji su bili ukupan prihod firme, broj zaposlenih, vrijednost izvoza i ostvareni dohodak po radniku. Prema ocjeni stručnog žirija, u oblasti trgovine, ugostiteljstva i turizma najuspješniji je Salko Omerović, direktor firme „Valplast“, u sektoru primarne poljoprivredne proizvodnje i prehrambene industrije za najuspješnijeg menadžera proglašen je Taib Joldić, direktor Voćnog rasadnika, a najuspješniji men-

džer u oblasti industrije građevinskog materijala, rudarstva i građevinarstva je Hazim Bašić, direktor firme Ingram. U oblasti metalske, drvoprerađivačke, PVC i ostale prerade za najuspješnijeg menadžera proglašen je Ramiz Karić, direktor firme „Herceg“, a u sektoru transporta najuspješniji menadžer je Fahrudin Selimović, direktor firme „Persel“. Ocjenom stručnog žirija, menadžer općine Srebrenik za 2011. godinu je Ramiz Karić, direktor d.o.o. „Herceg“, firme s 250 zaposlenih radnika, koja je u prošloj godini imala vrijednost proizvodnje od oko 20 miliona KM, od čega je preko 70 posto plasirano na tržište EU.



Ramiz Karić-menadžer općine Srebrenik za 2011.g

Općinski načelnik upriličio svečani prijem za pripadnike PS Srebrenik

Dana 25.05.2012.g., u kabinetu općinskog načelnika, upriličen je svečani prijem za pripadnike Policijske stanice Srebrenik. Delegacija policije, predvođena komandrom policije Karić Edinom, kao i šefovima resornih službi PS Srebrenik, nakon polaganja cvijeća na Centralno šehidsko spomen obilježje, na poziv načelnika Mehmeda Bajrektarevića, posjetila je kabinet načelnika. U ugodnom i prijatnom razgovoru načelnik je prisutnima čestitao 22. maj, Dan policije i istakao značaj i ulogu policije u našem društvu i zajednici. Općina Srebrenik je uvijek cijenila rad i djelovanje policije na očuvanju reda i mira te pomagala našoj Policijskoj stanici, u skladu sa mogućnostima općinskog budžeta. U razgovoru je, osim kvalitetne i obostrane saradnje, istaknuta i potreba vraćanja Policijske uprave u Srebrenik, na čemu treba nastaviti zajednički djelovati, jer općina sa oko 45.000 stanovnika i ovakvim geografskim položajem, to svakako zaslužuje. Komandir PS Srebrenik se zahvalio na čestitkama, prijemu kao i pomoći koju je općina Srebrenik u prošlosti pružala policiji naše općine, naglasivši da se nada da ista neće izostati ni ubuduće.



Detalj sa svečanog prijema

Aktivnosti povodom obilježavanja 22. maja, Dana policije TK-a

Povodom obilježavanja 22. maja, Dana policije TK-a, službenici policije Policijske stanice Srebrenik su, uz pomoć određenog broja privrednika sa područja Općine Srebrenik, na lokalitetu „gradskog bazena“ u Srebreniku, dana 16.05.2012.godine, organizovali ekipno i pojedinačno takmičenje u gađanju vazdušnom puškom. Takmičenje je proteklo u fer i korektnom duhu a najbolje rezultate u ekipnom plasmanu postigle su ekipe: 1)OK „RVI“ Srebrenik 2) „Herceg“ d.o.o Srebrenik i 3)PS Srebrenik (smjena „K“), dok su u pojedinačnom plasmanu najbolje rezultate postigli: 1)Mašić Agan, 2)Jusufović Sabin i 3)Joldić Nermin. Najboljim učesnicima su uručene „Diplome“, privrednicima koji su pomogli u organizaciji „Zahvalnice“, dok je nakon takmičenja priređen bogat kulturno-zabavni program. Navedena aktivnost je nastavak aktivnosti koje su ranije održane povodom 22. maja, Dana policije TK-a. Tako su dana 04.05.2012.godine, ministar unutrašnjih poslova Tuzlanskog kantona Bego Gutić i v.d. policijski komesar Fadil Šljivić, svečano otvorili takmičenje službenika policije MUP-a TK-a u gađanju službenim pištoljem, čime su i zvanično započete sportske aktivnosti u povodu obilježavanja "22. maja – Dana policije



Detalj sa takmičenja u streljaštvu



Mašić Agan

Tuzlanskog kantona". Na takmičenju koje je održano na strelištu Paša Bunar u Tuzli, 14 ekipa, sastavljenih od službenika MUP TK-a sa po tri člana, nadmetalo se u disciplini - gađanje iz pištolja kalibra 9 mm, sa distance od 25 metara u kružnu pištoljsku metu, stav stojeći. Na ovom takmičenju, ekipa Policijske stanice Srebrenik, u konačnom plasmanu zauzela je visoko treće mjesto.



OFK "Gradina" Srebrenik -



GTS s predstavom „Umro od smijeha“ uspješno gostovao u Prizrenu

Dana 02.06.2012.godine, u prepunoj sali Doma kulture "Xemaili Berisha" u Prizrenu, glumci Gradskog teatra iz Srebrenika su odigrali predstavu "Umro od smijeha", na koju je prizrenska publika izvanredno reagovala. Gostovanje Gradskog teatra "Srebrenik" je uslijedilo nakon kontakata i poziva predsjednika dramsko-humorističkog društva "Merak" Ramita Ametija da glumci ovog teatra održe jednu predstavu u Prizrenu i koji se zahvalio sponzorima koji su omogućili njihov dolazak. U tragikomediji, koju je režirao i napisao scenario, Fikret Mujkić glumi liječenog narkomana koji želi sebi oduzeti život ali ne zna na koji način to uraditi. Čitajući dnevnu štampu, prateći vijesti na TV-u i radiju, te svađajući se sa komšijama (Srbin, Hrvat, Rom) pravi razne komentare na njihov a i svoj račun, na što je publika reagovala gromoglasnim smijehom. Pored Mujkića u predstavi je učestvovala i srebrenička srednjoškolka i, akobogda, buduća glumica Adelisa Sejdinović, koja glumi komšinicu koja ga, na kraju, i ubijedi da ne izvrši samoubistvo. Kako piše kosovski portal <http://www.info-ks.net> Fikret Mujkić je, nakon predstave, na press konferenciji rekao da su njegovi utisci više nego pozitivni. -"Publika je bila fenomenalna i zahvalna. Mi bi željeli ponovo doći sa našim teatrom i sa većim programom, te da ovdje sa vašim glumcima to zajednički odradimo a da tu predstavu ponovimo i u našem gradu. Na taj način bili bismo i inicijatori uspostavljanja boljih odnosa ove dvije općine što bi, pozitivno odjeknulo i na Kosovu i kod nas. Jer



Detalj sa predstave odigrane u Prizrenu

mi bi prvi počeli a političari i privrednici bi onda najvjerovatnije nastavili." Na press konferenciji su naši predstavnici istakli da su oduševljeni Kosovom i Prizrenom, te da se zahvaljuju na lijepom prijemu odn. da se osjećaju kao da su kod kuće. I ova predstava je pokazala da Bošnjacima na Kosovu itekako nedostaju ovakvi i slični kulturni događaji i da se putem kulture mogu značajno poboljšati odnosi sa Bosnom i Hercegovinom.

Klub mladih Crvenog krsta Srebrenik obilježio „Međunarodni dan zdravlja“

U povodu Međunarodnog dana zdravlja, tokom proteklog vikenda, članovi Kluba mladih Crvenog krsta Srebrenik su organizirali akciju kontrole krvnog pritiska i šećera u krvi kod zainteresiranih građana. Akcija je realizirana u saradnji sa srebreničkim Domom zdravlja, a na posebnom štandu na gradskom šetalištu u Srebreniku priliku da besplatno kontrolišu krvni pritisak i nivo šećera u krvi iskoristilo je oko 150 građana. Kako ističu aktivisti Kluba mladih CK Srebrenik, akcija je organizirana s ciljem da se ukaže na značaj preventivnih zdravstvenih pregleda za očuvanje ljudskog zdravlja. Uz besplatne osnovne zdravstvene preglede, mladi volonteri su zainteresiranim građanima dijelili i prigodne letke s osnovnim informacijama o zdravom načinu ishrane, prevenciji i liječenju povišenog krvnog pritiska i šećera u krvi.



Međunarodni dan zdravlja u Srebreniku

ASuBiH „Dan planete Zemlje“ obilježio i u Srebreniku



Dan planete Zemlje u Srebreniku

Dan planete Zemlje obilježava se u više od 150 zemalja svijeta, a ovogodišnja kampanja nosi naziv "Zaštitimo naš dom – planetu Zemlju". Cilj kampanje je skretanje pažnje na opasnosti koje prijete životu na Zemlji, te poticanje zajedničke odgovornosti u očuvanju prirode i njenih bogatstava. Asocijacija srednjoškolaca u BiH (ASuBiH) obilježila je Dan planete u 31 gradu BiH čišćenjem i uređenjem nekih od javnih površina, distribuisanjem edukativnog materijala i pozivanjem građana da koriste cekere za višekratnu upotrebu. Tako je bilo i u Srebreniku. Članovi Lokalnog tima ASuBiH-a zajedno sa aktivistima Crvenog križa Srebrenik očistili su i uredili park kod spomen-kosturnice te podijelili promotivni materijal građanima. Uz sve to, pozvali su građane da prilikom kupovine koriste platnene cekere ili korpe umjesto plastičnih vrećica, kojih oko 1 milijarde tokom godine u BiH završe kao otpad u prirodi. (srebrenik.net)

Promocija knjige „Ne diraj u moju pjesmu“ i izložba likovnih radova i skulptura autora Muje Bjelića



Detalj sa promocije knjige "Ne diraj u moju pjesmu"

Dana 28.05.2012.godine, u organizaciji Bošnjačke zajednice kulture „Preporod“ Srebrenik, u prepunoj Plavoj Sali srebreničkog Doma kulture održana je promocija zbirke pjesama „Ne diraj u moju pjesmu“, autora Muje Bjelića iz Srebrenika. Riječ je o prvom samostalnom djelu ovog srebreničkog pjesnika koji se već dugo bavi pisanjem poezije i čije su pjesme, još prije više od četiri decenije, našle svoje mjesto u časopisima i kulturnim rubrikama brojnih tiražnih novina. Kako je istakla profesorica Šaha Salihović, pjesme objavljene u ovoj zbirci govore o prizorima i običajima iz autorova djetinjstva i na vjeran način oslikavaju ruralni bosanski ambijent i ljepotu i harmoniju stare bosanske porodice. U sklopu ove kulturne večeri, otvorena je i izložba likovnih radova i skulptura Muje Bjelića, ali i starih kućanskih i drugih predmeta, koje je ovaj pjesnik i slikar brižljivo skupljao dugi niz godina. Ova nesvakidašnja izložba, kako ističe sam autor, organizirana je s ciljem da se sačuva od zaborava stari bosanski duh i način življenja, ali i da se onima koji atakuju na našu kulturu i tradiciju skrene pažnja na ljepotu starih bosanskih običaja.



Detalj sa izložbe slika Muje Bjelića



Promociju su pratili brojni posjetioци



Detalj sa izložbe slika i skulptura Muje Bjelića

U Tuzli održana manifestacija "Majski cvijet"

„Majski cvijet“ naziv je muzičke manifestacije koja je 10. maja 2012.g., održana u velikoj sali Bosanskog kulturnog centra u Tuzli. Navedena manifestacija je okupila veliki broj mališana koji su imali prilika pokazati svoje umijeće u pjevanju. Stručnom žiriju su predstavljene 23 kompozicije a nagrade su dodijeljivane u kategoriji horova i solista. Među kompozicijama koje su predstavljene na ovoj manifestaciji, našle su se i dvije predstavnice naše Općine, Melika Moranjkić i Lejla Zahirović. Odličnom izvedbom pjesme "Rođeni" (Kaliopi), Melika Moranjkić je osvojila prvo mjesto, dok je izvedbom pjesme "Med i žaoka" Lejla Zahirović zauzela drugu poziciju. Prvo mjesto, predstavnica Općine Srebrenik Melika Moranjkić, dijelila je sa Nerminom Lukavačkić iz Lukavca. (www.srebrenik.net)



Detalj sa manifestacije Majski cvijet



Lejla Zahirović i Melika Moranjkić

Sjećanje na Ešrefa Berbića



Detalj sa manifestacije "Sjećanje na Ešrefa Berbića"

Dana 23.04.2012.godine, u organizaciji BZK „Preporod“ Srebrenik u srebreničkom Domu kulture održana je manifestacija pod nazivom „Sjećanje na Ešrefa Berbića“, posvećena poznatom srebreničkom dječjem pjesniku, koji je preminuo prije nepune dvije godine. O bogatom književnom opusu Ešrefa Berbića, čije su pjesme i priče našle svoje mjesto i u čitankama za osnovne škole još prije više od 40 godina, govorio je Nermin Tursić, predsjednik BZK „Preporod“ Srebrenik, naglasivši da je ovaj poznati pisac bio i jedan od osnivača srebreničkog Preporoda. Uz veliki broj ljubitelja pisane riječi iz Srebrenika, manifestaciji koja bi trebala postati tradicionalnom,

prisustvovalo je i desetak pjesnika iz Tuzle, Gračanice i Doboja Istoka. U sklopu manifestacije „Sjećanje na Ešrefa Berbića“, proglašeni su i pobjednici literarnog konkursa na koji su pristigla 62 rada učenika srebreničkih osnovnih škola. Odlukom stručnog žirija, za pet najboljih literarnih radova, proglašeni su: „Neka rata ne bude“ Mirze Mujedinovića, „Pjesma o pjesniku“ Dženite Joldić, „Planeta zemlja“ Sanjina Smajlovića, „Djetinjstvo“ Ajle Kešetović i „Pjesniku“ Dženite Joldić. Autorima najboljih radova predstavnici BZK „Preporod“ Srebrenik uručili su diplome i prigodne nagrade.

Dom zdravlja Srebrenik sveukupni pobjednik „Medicinijade 2012“



Zajednička fotografija ekipe DZ Srebrenik

JZU „Dom zdravlja“ Srebrenik je u periodu od 18. do 20.05.2012.godine, u Neumu, učestvovao na 13. Sportskim susretima zaposlenika u zdravstvu Sjeveroistočne Bosne „Medicinijada 2012“. Ovogodišnji organizator Medicinijade je bio Dom zdravlja Kalesija, a nastupilo je 20 ekipa sa oko 700 učesnika. Prema općem dojmu organizacija sportskih susreta je bila na zavidnom nivou. Kako je istakao Ešref dr. Harčinović, direktor Doma zdravlja Srebrenik, naši predstavnici su postali sveukupni pobjednici Medicinijade 2012, čime je nastavljen kontinuitet dosadašnjih uspjeha. Takmičenja su se održala u 11 disciplina, a obzirom da su



Odbojkaši Doma zdravlja Srebrenik

ekipe DZ Srebrenik osvojile medalje i pehare u 7 disciplina (odbojka muškarci, rukomet žene, odbojka žene, odbojka na pijesku žene, šah te navlačenje konopca u muškoj i ženskoj konkurenciji) naš Dom zdravlja je s pravom ponio tutulu sveukupnog pobjednika Medicinijade 2012. Najzujbudljiviji susret na Medicinijadi 2012 je bio finalni meč u odbojci za muškarce između ekipa Doma zdravlja Srebrenik i Doma zdravlja Odžak, velikih prijatelja i sportskih rivala, u kome su naši odbojkaši, nakon velike borbe i u paklenoj atmosferi, pobijedili rezultatom 2: 1.

Održana četvrta po redu „Kotličijada“



Najboljima su uručene diplome

Dana 28.04.2012.godine, u organizaciji Udruženja sportskih ribolovaca i Planinarskog društva „Majevica“ Srebrenik, na platou ispred Sportske dvorane u Srebreniku, održana je četvrta po redu kotličijada. Učestvovalo je 20 ekipa s područja srebreničke općine koje su, pred velikim brojem radoznalih posjetilaca, demonstrirale svoje vještine u pripremi tradicionalnih bosanskih jela. Prema ocjeni stručnog žirija, najbolji bosanski lonac pripremio je „Dom

za nezbrinutu djecu“ Bare, u kategoriji fiš-paprikaša prvo mjesto je osvojila ekipa MZ Kiseljak, dok je u kategoriji gulaša najuspješnija bila ekipa SZD „Mujezinović“ Srebrenik. Najuspješnijim ekipama uručne su diplome, a nakon proglašenja pobjednika upriličeno je druženje, na kojem su svi posjetioci imali priliku da besplatno probaju tradicionalna bosanska jela koja su u svojim kotličima pripremili učesnici takmičenja.

Srebrenik ima dobre uslove za uzgoj krastavaca-kornišona



Najbolji proizvođači su nagrađeni novčanom nagradom

Sredinom marta 2012.godine, u prostorijama Doma kulture u Srebreniku, održan je sastanak predstavnika firme „Bosnia kornišon“ iz Kalesije i Zemljoradničke zadruge „Voćar“ iz Zvornika sa srebreničkim poljoprivrednicima, na kojem je razgovarano o proizvodnji i plasmanu krastavca-kornišona u 2012. godini. Kako je rečeno na sastanku, zahvaljujući povoljnim uslovima koje nude „Bosnia kornišon“ i „Voćar“, prošle godine se za proizvodnju kornišona odlučilo 250 srebreničkih poljoprivrednika koji su ovim otkupljivačima isporučili oko 450 tona ove povrtlarske kulture. Naime, svi povrtlari koji potpišu ugovor imaju siguran plasman po zagarantiranim cijenama, a predstavnici „Bosnia kornišona“ i „Voćara“ na kućni prag će im dostaviti neophodne repromaterijale. Povrtlarima koji se odluče za ovu vrstu proizvodnje praktično nije potreban novac za početna ulaganja u proizvodnju, jer se preuzeti repromaterijal

kompenzira isporukom krastavca - kornišona na kraju isporukom krastavca-kornišona na kraju proizvodnog ciklusa. Očekuje se da će ove godine kooperantske ugovore potpisati oko 300 srebreničkih povrtlara, a sastanku je prisustvovala i grupa poljoprivrednika iz susjedne Gračanice koji su, takođe, izrazili interes za ovu vrstu proizvodnje. U sklopu radnog sastanka održan je i edukativni seminar za potencijalne proizvođače krastavca-kornišona. O tehnologiji proizvodnje ove povrtlarske kulture koja se primjenjuje u Evropskoj uniji i najnovijim sredstvima za zaštitu bilja govorili su poljoprivredni stručnjaci iz Mađarske. Direktor Zemljoradničke zadruge „Voćar“ Fahrudin Delibajrić uručio je novčane nagrade trojici najuspješnijih kooperanata s područja ove općine, koji su u prošloj godini ostvarili prinose kornišona od 6.500 do 8.600 kilograma po dunumu. Novčane nagrade u iznosu od 150, 100 i 50 KM dobili su Mustafa Kešetović, Mensud Hasanović i Jusuf Zahirović.



Detalj sa sastanka

Nevrijeme praćeno ledom i zemljotres pogodili Srebrenik

Dana 23.04.2012.godine oko 13,30 sati, nevrijeme praćeno kišom, vjetrom i ledom pogodilo je Srebrenik. Osim izuzetno jake kiše, nekoliko minuta je intenzivno padao led veličine oraha, koji je na području od Špionice, preko Ježinca i Čehaja pa do Srebrenika, prčinio veliku materijalnu štetu na usjevima i voćkama, koja se mjeri stotinama hiljada KM. Žalosno je bilo pogledati otpali behar, lišće i grane sa jabuka, krušaka, šljiva, trešanja, uništeno je cvijeće, grožđe, jagode, luk i sl. tako da će urod brojnih kultura u ratarstvu i voćarstvu, u najboljem slučaju, biti prepolovljen. Kako tvrde očevici bilo je i oštećenja pojedinih putničkih vozila, te te oštećenja na krovovima kuća, ali je ipak sve prošlo relativno dobro obzirom da nije bilo povrijeđenih lica. Zbog



Nevrijeme u Centru Srebrenika (foto Aličić Halid)



Led u Barama (foto Amir Mehmedović)

velike količine padavina u nekim dijelovima grada putevi su bili teško prohodni. Ono što je posebno uplašilo Srebreničane je to da se ovo nevrijeme sa, do sada neviđenim, ledom desilo u aprilu, tako da je pravo pitanje šta tek možemo očekivati u ljetnim mjesecima. Dana 05.06.2012.g, aparati u Centru za seizmologiju Federalnog hidrometeorološkog zavoda u Sarajevu, registrovali su u 10 sati i 15 minuta zemljotres umjerene jačine, 87 kilometara sjeverno od Sarajeva, na području između Gradačca i Gračanice. Magnituda potresa u hipocentru je iznosila 3.1 Richtera, a intenzitet u epicentru je bio IV stepeni Merkalijeve skale. Prema preliminarnim podacima ovaj potres, koji se snažno osjetio i uplašio građane i na području općine Srebrenik, nije izazvao materijalnu štetu. Također, isti dan u 21 sati i 15 minuta osjetio se novi zemljotres istog intenziteta, koji također nije izazvao materijalnu štetu.

Maturanti MSŠ Srebrenik proslavili maturu

U skladu sa tradicijom, koja traje posljednjih nekoliko godina, dana 02.06.2012.godine u 19 sati, ulicama Srebrenika, prodefilovali su svi maturanti Mješovite srednje škole Srebrenik. Praćeni od strane nekoliko hiljada Srebreničana i gostiju sa strane, maturanti su se, u prelijepim haljinama i odijelima, predvođeni svojim razrednim starješinama, nakon prolaska pored Prve osnovne škole te svečanog defilea gradskim šetalištem, okupili ispred Centralnog spomen-obilježja poginulim u ratu 1992-1995.g. na Trgu Alije Izetbegovića, gdje je priređen prigodan program. Na čelu povorke je bio direktor MSŠ Srebrenik Nišić Sumedin, prof. Djedović Sadeta i učenica generacije školske 2011/2012 u MSŠ Srebrenik Omerović Mirheta, učenica Ekonomske škole. Maturantima se prvo obratio direktor Nišić, koji je izjavio da se nada da će i ovi mladići i djevojke, kao i oni



Nišić Sumedin, Djedović Sadeta i Omerović Mirheta na čelu kolone



Detalj sa mature

prethodnih generacija, dostojno reprezentovati svoju školu i Općinu Srebrenik tokom daljnog školovanja ili tokom rada, zaželeći im puno uspjeha i sreće u narednom periodu. Prisutnima se obratila i Omerović Mirheta, koja je ukratko predstavila svoje viđenje proteklog perioda školovanja te se zahvalila profesorima i kolegama i kolegicama, koji su joj pomogli da u nastavnim i vannastavnim aktivnostima postigne mjerljive rezultate, koji su i doprinijeli da postane učenica generacije. U nastavku programa maturanti su, do 2 sata rano ujutro, nastavili prigodno druženje u Motelu «Park» Srebrenik, uz prigodni muzički program. Sa nekoliko fotografija pokušaćemo da dočaramo bar dio atmosfere sa mature učenika završnih razreda MSŠ Srebrenik 2011/2012 g.

Obilježen Dan škole u Prvoj i Drugoj OŠ Srebrenik, te OŠ Podorašje i Duboki Potok



Najbolji učenici Prve OŠ sa VD direktorom Vikalo Esadom

Dana 18.05.2012. godine svečano je obilježen Dan Prve osnovne škole Srebrenik. Tim povodom u hodnicima škole održana je izložba najuspješnijih učenjskih radova, a centralni dio svečanosti upriličen je u centralnom holu Prve osnovne škole, gdje je pred brojnim roditeljima, učenicima, nastavnicima i drugim gostima, priređen prigodan kulturno umjetnički program. VD direktor Esad Vikalo je u prigodnom govoru predstavio školu te podsjetio na brojne uspjehe koje

je ovaj kolektiv postigao u ovoj školskoj godini, nakon čega je podijelio nagrade najboljim učenicima ove škole kao i najboljim polaznicima Odjeljenja osnovne muzičke škole. Istog dana svečano je obilježen i Dan Druge osnovne škole Srebrenik te OŠ Podorašje i OŠ Duboki Potok, dok su narednih dana proslavljeni Dani škole i u preostalim školama, gdje su održana sportska takmičenja učenika te priređen prigodan kulturno umjetnički program, gdje su podijeljene nagrade najboljim učenicima i nastavnicima.

Košarkaši Gradine iz Srebrenika treći u A1 Ligi KS BiH u sezoni 2011/2012



KK "Gradina" Srebrenik sezona 2011/2012 g.

KK Gradina je u sezoni 2011/2012 postigla najveći uspjeh od osnivanja kluba zauzevši 3. mjesto u A1 Ligi KS BiH i ulazak u polufinale PLAY OFF-a, što ne bi trebao da bude maksimum za ovaj sportski kolektiv. Košarkaši Gradine su svoju 2. takmičarsku sezonu u A1 Ligi KS BiH završili porazom u polufinalu PLAY OFF-a za ulazak u viši rang takmičenja. Svoju 2. pobjedu nad KK Gradinom ostvarili su košarkaši Sparsa iz Sarajeva, koji su naše košarkaše pobijedili sa 59:68 i time izborili prolazak u finale PLAY OFF-a A1 Lige. Utakmica je čitavim tokom bila uzbudljiva u kojoj su gosti imali više sreće i širu klupu koja je prevagnula u ovoj utakmici. Treba napomenuti da je KK Gradina bila oslabljena neigranjem prvog strijelca lige Alena Horozića koji se, prije utakmice, povrijedio i nije bio u mogućnosti po-

moći svojim suigračima. Sve u svemu iza košarkaša Gradine je odlična sezona koju su iznijeli košarkaši: Karić, Hodžić I., Avdić, Hasić, Adrović, Bečić, Nurkanović, Hodžić J., Đonlić, Gopo, Hasić R., Horozić i pojačanje u PLAY OFF-u Hujdurović, predvođeni trenerom Mićanović Vladimirom. Na njihovim utakmicama u SRC Srebrenik se redovito okupljalo po par stotina gledalaca, koji su svojim fanatičnim navijanjem stvarali prekrasan ambijent dostojan euroligaških utakmica, te su bili velika podrška našim košarkašima. Menadžment KK Gradina se zahvaljuje svojim vjernim navijačima te ljudima koji su pomogli da Gradina postigne ovaj zavidan rezultat te ih poziva da i dalje ostanu uz KK Gradinu i da zajedno nastavimo sa ovom lijepom sportskom pričom iz Srebrenika.

Održana Skupština Sportskog saveza Srebrenik

Članice Sportskog saveza Općine Srebrenik na redovnoj Skupštini koja je održana 26.04.2012.godine, raspodijelili su 139.500 KM prema prijedlogu Upravnog odbora ovoga tijela. To je u odnosu na prošlu godinu 10% manje, s obzirom na već najavljene uštede iz općinskog budžeta. Najviše sredstava ostalo je Sportskom savezu za njegov rad i to 19.600 KM, te za dva fudbalska kluba i to N.K. „Ingram“ iz Dubokog Potoka i N.K. „Mladost“ iz Tinje, članovima Druge lige FBiH-grupa Sjever i to po 19.200 KM, s obzirom da se fudbaleri, košarkaši i odbojkaši Gradine finansiraju direktno iz budžeta Općine, pa su od Sportskog saveza ova tri kluba dobila manje sredstava. Za njih će se izdvojiti direktno iz budžeta Općine 110.000 KM plus 27.000 KM za zakup sati u Sportskoj dvorani te 15.400 KM za održavanje Gradskog stadiona. Uz usvojeni Izvještaj o radu za prošlu godinu kao i finansijski izvještaj bilo je i pohvala ali i primjedbi, koje su se uglavnom odnosile na Izbor sportiste godine, zatim na nedobivanje odgovora na postavljena pitanja, da Upravni odbor mora najmanje dva puta godišnje dolaziti u posjete članicama i biti upoznat o njihovom radu, da N.K. „Ingram“ treba više sredstava s obzirom da imaju sve tri selekcije koje se takmiče u Omladinskoj ligi-Sjever, kao i niz drugih primjedbi koje Sportski savez treba otkloniti i popraviti u narednom periodu. Istaknuto je da se sport u Srebreniku nalazi u jednoj ekspanziji, obzirom da su prošle godine košarkaši Gradine



Detalj sa Skupštine Sportskog saveza Srebrenik

ušli u A1 ligu, a odbojkašice u Prvu ligu FBiH, dok su se ove godine fudbaleri Gradine, dobrim igrama, nametnuli kao najozbiljniji kandidat za ulazak u Premijer ligu BiH, dok košarkaši Gradine igraju Play-off za ulazak u elitni rang bh. košarke.

Frankopan i juniori Gradine pobjednici Općinskog kupa

Nogometaši Frankopana iz Špionice pobjednici su Općinskog kupa, dok su u juniorskoj konkurenciji najbolji omladinci Gradine. Na Gradskom stadionu u Srebreniku u juniorskoj konkurenciji Gradina je bila bolja od Ingrama rezultatom 2:1, dok je u seniorskoj konkurenciji Frankopan sa 3:1 bio bolji od komšijske Bosne 1953 iz Špionice. Trijumf juniora Gradine nad



U juniorskoj konkurenciji najbolja je srebrenička Gradina

KK Gradina iz Srebrenika prva na turniru u Odžaku

Košarkaši „Gradine“ iz Srebrenika osvojili su 1. mjesto na XV. Memorijalnom turniru „Amir Jupić-Pidžama 2012“ koji je 20. maja 2012.g. održan u Odžaku. Na turniru su sudjelovali: KK Gradina Srebrenik, KK Gradina Koteks Trica –Tešanj i domaćin KK Odžak, dok je ekipa Meteora iz Đakova u posljednji tren otkazala dolazak. Navedeni turnir posvećen Amiru Jupiću, stradalom pripadniku 102. HVO brigade Odžak otvorio je ministar Vlade Županije posavske Ivo Jelušić a prigodne riječi uputili su predsjednik KK Odžak Blaž Kovačević i načelnik općine Luka Jurić. Uz ostale bili su Mijo Matanović zastupnik u Domu naroda Parlamenta FBiH



i Anes Osmanović podpredsjednik Skupštine ŽP. KK „Gradina“ je superiornom igrom u polufinalu i finalu turnira zaslužno zauzela 1. mjesto. U prvoj utakmici košarkaši Gradine su se sastali sa ekipom Gradine-Koteks iz Tešnja i u veoma tvrdog utakmici zabilježili zasluženu pobjedu sa 80:72. U ovoj utakmici svi igrači su iskoristili svoju minutažu koju im je ukazao trener Mićanović. KK „Gradina“ je na turniru nastupila u slijedećem sastavu: Karić, Lipjankić, Avdić, Hercegovac, Adrović, Bečić, Nurkanović, Hodžić, Đonlić, Gopo, Hrnčić. U finalu KK „Gradina“ je igrala protiv domaćina KK „Odžak“ i ostvarila ubjedljivu pobjedu sa 92:76. Treba istaći da je za najkorisnijeg igrača turnira izabran Edin Nurkanović iz KK „Gradine“, dok je za najboljeg strijelca turnira proglašen Almir Hasandić iz KK „Odžak“ koji je ujedno bio i pobjednik u zakucavanju.



N.K. Frankopan Špionica-pobjednici Općinskog kupa

ekipom Ingrama i ne treba da čudi, s obzirom da nekolicina mladića iz juniorskog pogona poput Andrića, Ordagića, Tursunovića...već igra u prvom timu Gradine, koja će najvjerojatnije ući u Premijer ligu BiH. Pobjedničke ekipe plasirale su se u daljnje takmičenje na nivo Tuzlanskog kantona u okviru Kup-a, a njima je pehare i medalje uručio načelnik Općine Srebrenik, Mehmed Bajrektarević.

Održan kantonalni karate turnir „Srebrenik 2012“



Detalj sa karate turnira

Dana 19.05.2012. godine, u SRC Srebrenik, održan je kantonalni karate turnir "Srebrenik 2012". Na turniru je učešće uzelo oko 400 takmičara iz 17 klubova sa područja TK-a. Najuspješniji klub je bio KK "Zmaj" iz Gradačca. Najuspješnijim takmičarima podijeljene su medalje i diplome. Takmičari karate kluba "Srebrenik" i ovog puta su postigli značajan uspjeh, osvojivši 2 zlatne, 6 srebrenih i 12 bronzanih medalja.



Najbolji su dobili diplome

Održan 3. internacionalni karate kup „Srebrenik 2012“

Dana 18.03.2012. godine u organizaciji karate kluba „1. mart“ iz Srebrenika, a u povodu Dana nezavisnosti BiH, te obilježavanja 7 godina rada kluba, održan je 3. internacionalni karate kup „Srebrenik 2012“ na kome je učešće uzelo preko 430 takmičara iz BiH i regiona. Na ovom, vrhunski organizovanom, takmičenju bile su prisutne mnoge zvaničnice i to: predsjednik karate saveza FBiH Mujo Gec, sekretar karate saveza, članovi Upravnog odbora karate saveza FBiH, selektori, zatim članovi Upravnog odbora sportskog saveza općine Srebrenik, te drugi zvaničnici i sponzori turnira. Turnir je u ime općinskog načelnika otvorio predsjedavajući općinskog vijeća prim.dr. Ibrahim Zukić. Prije samog početka takmičenja uručena su specijalna priznanja najuspješnijim takmičarima ovog kluba za rezultate postignute u 2011. godini i to: -Kešetović Arminu za osvojenih 28 medalja (19 zlatnih, 4 srebrene i 5 bronzanih) - Karić Aldinu za osvojenih 36 medalja (21 zlatna, 9 srebrenih i 6 bronzanih) - Salihbašić Sakibu – najtrofejniji takmičar u muškoj kategoriji sa osvojenih 33 medalje (23 zlatne, 8 srebrenih i 2 bronzane) - Kešetović Saneli – osvojenih 28 medalja (20 zlatnih, 4 srebrene i 4 bronzane) - Kulović Azri – osvojenih 40 medalja (20 zlatnih, 17 srebrenih i 3 bronzane) te najtrofejnijoj takmičarki ovog kluba Hadžić Mineli koja je u 2011. godini osvojila 58 medalja (30 zlatnih, 19 srebrenih i 9 bronzanih), te je na 5 turnira proglašavana najuspješnijom takmičarkom. Nakon ove ceremonije pristupilo se takmičenju u katama u pojedinačnoj i ekipnoj konkurenciji, gdje je u seniorskoj konkurenciji u katama 1. mjesto osvojio Jašarević Edin (KK „1. mart“) a u seniorskoj ženskoj kategoriji u katama 1. mjesto osvojila je Minela Hadžić (KK „1. mart“). Nakon toga



Dodjela nagrade Mineli Hadžić

u drugom dijelu turnira počela su takmičenja u borbama u pojedinačnoj i ekipnoj konkurenciji. Svakako najatraktivnije su bile borbe u seniorskim kategorijama u muškoj i ženskoj konkurenciji, gdje su se isti borili za vrijedne novčane nagrade u apsolutnim kategorijama. Osvajači novčanih nagrada u ženskoj konkurenciji su: 1. mjesto: Softić Lejla – Sensei Turija – 150 KM 2. mjesto: Mehić Dženana – Salko Ćurić Travnik – 100 KM 3. mjesto: Memić Adela – Sensei Turija – 50 KM U muškoj konkurenciji novčane nagrade su osvojili: 1. mjesto: Džanić Edis – Lokomotiva Brčko – 200 KM 2. mjesto: Plavšić Meho – Forma Tuzla – 150 KM i 3. mjesto: Balkić Salko – Forma Tuzla – 100 KM Najuspješnijim takmičarima turnira proglašeni su: - Softić Lejla (Sensei Turija) sa osvojenih 5 zlatnih, 4 srebrene i 2 bronzane medalje; Karić Aldin (1. mart) sa osvojenih 3 zlatne, 1 srebrena i 1 bronzana medalja. Osim Aldina među domaćim takmičarima na ovom turniru istakli su se i slijedeći takmičari: - Hadžić Minela – 4 zlatne, 1 srebrena i 1 bronzana medalja; Kulović Azra– 3 zlatne medalje; Kešetović Kenan – 3 zlatne medalje; Husić Amela – 2 zlatne i 1 srebrena medalja; Kulović Elma – 2 zlatne i 1 srebrena medalja. Za najuspješniji klub na ovom takmičenju proglašen je karate klub „Sensei“ Turija, čiji su takmičari osvojili 40 medalja i to 10 zlatnih, 11 srebrenih i 19 bronzanih, te im je dodijeljen pobjednički pehar. Takmičari domaćeg kluba koji, po pravilu, ne ulazi u izbor za najuspješniju ekipu osvojili su čak 59 medalja i to 28 zlatnih, 15 srebrenih i 16 bronzanih. (ntv jata)



Karate kup je otvorio prim. dr. Zukić Ibrahim

„Budućnost“ Bijeljina osvajač turnira „Silver Ball 2012“

Dana 10.06.2012.godine u SRC Srebrenik je održan međunarodni košarkaški turnir za kadete „Silver Ball 2012“, koji se okupio četiri ekipe sa područja TK-a, Posavine, Šemberije i Slavonije. U prvom meču sastali su se domaćin Škola košarke Silver Kings iz Srebrenika i KK Vinkovci iz Hrvatske. Pobjedu su odnijeli Kingsi rezultatom 38:31. U drugom meču sastali su se KK Budućnost Bijeljina i KK Brčko DC. Favorizirana ekipa iz Bijeljine, inače učesnik završnice Prvenstva BiH, odnosi pobjedu i ostvaruje plasman u finale. U utakmici za treće mjesto, u izjednačenoj igri, KK Vinkovci odnose pobjedu i osvajaju treće mjesto na turniru. U finalu smo gledali zanimljivu utakmicu i dobru košarku između Silver Kingsa i Budućnosti iz Bijeljine. Iako su bili favoriti Bijeljinci su tokom cijelog meča zaostajali za domaćinom, čija je prednost većim dijelom utakmice bila i do 10 poena. Ipak iskusnija ekipa iz Bijeljina u posljednje dvije minute, pogodcima za tri poena i presing igrom, uspijeva preokrenuti i pobijediti rezultatom 42-38. Ekipama su podijeljene diplome i zahvalnice.



Detalj sa turnira "Silver Ball 2012"

Aktivnosti tima za prevenciju maloljetničkog prestupništva



Detalj sa predavanja

U Srebreniku je, 23.5.2012. godine, održana radionica na kojoj je kreiran akcioni plan Multidisciplinarnog tima za prevenciju maloljetničkog prestupništva i promociju alternativnih mjera za maloljetnike Općine Srebrenik u narednih 12 mjeseci. Ovo tijelo je osnovano Rješenjem načelnika Općine u aprilu 2012. godine, a na inicijativu Biroa za ljudska prava Tuzla, nevladine organizacije koja se u posljednjih 7 godina intenzivno bavi problematikom maloljetničkog prestupništva i unapređenjem sistema maloljetničkog pravosuđa. Navedeni tim je osnovan kao volontersko tijelo profesionalaca koje čine predstavnici Općine Srebrenik, Centra za socijalni rad Srebrenik, Policijske stanice Srebrenik, Prve i Druge osnovne škole Srebrenik, Osnovne škole Rapatnica, Mješovite srednje škole Srebrenik, Aktiva direktora osnovnih i srednjih škola sa područja Srebrenika i Crvenog krsta/križa Srebrenik. Tim je u proširenom sastavu (predstavnici roditelja učenika osnovnih škola u Srebreniku, PS Srebrenik, Centra za mentalno zdravlje Doma zdravlja u Srebreniku, kao i Općinskog suda u Gradačcu, kao nadležnog suda i za područje Općine Srebrenik), kao svoja strateška opredjeljenja za narednih 12 mjeseci definisao sljedeće oblasti: 1) izgradnja kapaciteta i afirmacija Multidisciplinarnog tima u lokalnoj zajednici, 2) unaprjeđenje uslova za primjenu alternativnih modela postupanja prema maloljetnicima u sukobu sa zakonom; 3) razvijanje koordinirane i kontinuirane prevencije maloljetničkog prestupništva u Općini Srebrenik i 4) obezbjeđivanje prateće infrastrukture za primjenu alternativnih mjera za maloljetnike. U sklopu ostvarivanja ovih strateških ciljeva, bit će provedene brojne aktivnosti. U sklopu implementacije projekta Rad policije u zajednici, službenici Policijske stanice Srebrenik kao i JU "Disciplinski centar za maloljetnike TK-a", su u organizaciji nevladine organizacije "Biro za ljudska prava Tuzla", tokom mjeseca maja 2012. godine, realizovali preventivne aktivnosti na suzbijanju maloljetničkog prestupništva, kroz edukativna predavanja, odnosno radionice kojima prisustvuju učenici, nastavnici, roditelji i predstavnici navedenih institucija. Naime, dana, 08.05.2012.godine održane su radionice - predavanja u Prvoj i Drugoj osnovnoj školi Srebrenik, na sljedeće teme:

- trenutno stanje maloljetničkog prestupništva u Tuzlanskom kantonu (Općini Srebrenik),
- uloga policije i drugih institucija u prevenciji i suzbijanju maloljetničkog prestupništva,
- faktori rizika, kreativno rješavanje konflikta,
- upoznavanje sa UN-ovom Konvencijom o pravima djeteta,
- razmjena iskustava i stručnih znanja i sl.,

dok su radionice za roditelje održane 10. i 14.05.2012.godine. Za sva dodatna pitanja i informacije možete se obratiti O.Š. "Tinja" (direktor Enis Dedić, predstavnik Aktiva direktora osnovnih i srednjih škola opštine Srebrenik, kontakt telefon 035 651 619) i Birou za ljudska prava Tuzla (projekt koordinator Lejla Mehanović, kontakt telefon 035 360 491).

Naši učenici na „Kid's festivalu 2012“

U sklopu projekta „Rad policije u zajednici“, predstavnici učenika svih osnovnih škola sa područja Općine Srebrenik su i ove godine, na inicijativu Policijske stanice Srebrenik a pod pokroviteljstvom/sponzorstvom načelnika Općine Srebrenik, dana 11. juna 2012. godine, uz pratnju predstavnika PS Srebrenik, putovali u Sarajevo-sportski centar "Zetra", gdje se održava 9. Tradicionalni međunarodni "Kid's festival". Kid's festival je najveći nezavisni događaj za djecu i mlade u jugoistočnoj Europi. Svake godine Festivalu prisustvuje preko 40.000 djece iz svih krajeva BiH. To je kulturna manifestacija odnosno veliki projekat kojem se raduju djeca iz cijele BiH, a stotine pisama koja su upućena organizatoru, pokazuju koliko su djeca uživala u svom posjetu Kid's festivalu, dok je za neke to bio i "najbolji dan u životu". Uz veoma veliki broj edukativno-zabavnih radionica, performansa i animacija, djeci se prikazuju i velika filmska ostvarenja među kojima su BIH i evropske premijere. Obzirom da se radi o programski najbogatijoj i po posjećenosti najvećoj manifestaciji ove vrste, Kid's festival je već sada pronašao



Naši učenici na Kids festivalu

svoje mjesto u paleti svjetskih festivala. Ogroman uspjeh Kid's festivala je rezultat jedinstvene kombinacije edukacije i zabave, koja kroz igru gradi povjerenje među desetinama hiljada mladih BiH. Treba napomenuti da je, osim Općine Srebrenik, značaj ove manifestacije za djecu prepoznao i menadžment preduzeća "Hanerix"d.o.o Špionica, koji je kupovinom sokova i slatkiša prijatno iznenadio učenike.



Naši učenici na Kids festivalu

Fudbaleri Gradine novi premijerligaši

Fudbaleri Gradine su supeirorno osvojili naslov najbolje ekipe u Prvoj ligi FBiH i sasvim zasluženno izborili plasman u Premijer ligu BiH. Izabranici trenera Samira Adanalića i njegovog asistenta Nermina Džanića, imali su sezonu iz snova, gdje su na krilima spoja iskustva i mladosti došli do fantastičnog uspjeha. Premda su kao najveći pretendenti za osvajanje prvog mjesta bili Rudar iz Kaknja, Budućnost iz Banovića, Vitez i Čapljina sa daleko većim budžetima, odlično ukomponovana ekipa predvođena iskusnim tercetom Zukić-Turbić-Damir Smajlović sa nekolicinom mladih igrača, iznjedrila se u najbolji tim Federacije BiH, sa sedam bodova prednosti u odnosu na drugoplasiranu banovićku Budućnost. Uprava su ova trojica igrača iznijeli najveći teret u proljeće, s



OFK Gradina u Kaknju

obzirom da je Damir Smajlović postigao 19 golova, Alen Turbić dva ključna gola i to protiv Viteza za 1:0 i kontra Rudara u Kaknju za 1:1, dok je golman Damir Zukić u nekoliko utakmica, posebno gostujućih, bio posljednja prepreka za domaće odbrane. Mladi 18-godišnji Ermin Husejnbasić u jesen je postigao 11 golova i bio prvi strijelac Lige, međutim u proljeće je zaustavljen u tom nizu prvenstveno zbog povreda, međutim i takav je postigao



Detalj sa utakmice Branitelj-Gradina

ključan gol u Banovićima za osvajanje velikog boda. U odbrambenim zadacima velike poslove obavili su Osman Hadžić, Darko Mitrović, Ermin Džananović te Sanel i Emir Alić, a priliku je dobivao i mladi Haris Musić. U veznom redu uz nešto iskusnije Anela Salihbasića, Kenana Turudiju, Salihu Muminovića i kapitena Malika Smajlovića, često su u „vratu“ gurnuti i juniori poput Dine Andrića, Mahira Vejzovića, Emila



Detalj sa utakmice Gradina-Branitelj



Detalj sa utakmice Gradina-Iskra

Tursunovića i Amera Ordagića, dok se „ubojitom“ napadačkom tercetu Husejnbasić-Turbić-Smajlović pridodavao i Almir Popara. Od povreda i udaraca liječio ih je fizioterapeut Nedim Mujkić. Iza ovog uspjeha, ogromnu zaslugu ima rukovodstvo Kluba na čelu sa predsjednikom Dževadom Drapićem, dopredsjednikom Nedžadom Aljkovićem te spoljnim saradnikom Adom Husarićem, koji su posljednje tri godine zajedno sa Općinom Srebrenik i načelnicima Osmanom Suljagićem te Mehmedom Bajrektarevićem, iznijeli i najveći teret, te prvo Gradinu iz Druge lige FBiH vratili u Prvu ligu FBiH, stabilizovali Klub a zatim i osigurali plasman u Premijer ligu. Ovdje je nemoguće zaboraviti i direktora Ibru Ibrica, dugogodišnjeg sportskog radnika, a svoj udio u ovome imaju i ostali članovi Uprave koji su „pojačali“ rad zimom i to dvojac iz Općine, Muhamed Jašarević kao dopredsjednik i Faruk Vikalo, te Nermin Mujkić kao i dva dopredsjednika Skupštine, Adis Fazlić i Nedžad Delić, sekretar Ibro Mulaibrahimović te portparol Muhamed Suljagić. Premda je Gradina igrala najveći rang u BiH u postratnom periodu, koji se igrao samo na 1/3 BiH i to na teritoriji gdje većinom žive Bošnjaci, ovo se smatra najvećim uspjehom u historiji Kluba, s obzirom da će Gradina po prvi puta igrati takmičenje na prostoru cijele države, pa ćemo od naredne sezone u Srebreniku (odn. u Gradačcu dok se ne renovira gradski stadion) gledati Željezničara, Sarajeva, Borca, Širokog, Zrinjskog, Čelika...Na kraju opstanak Gradine u društvu najboljih klubova BiH bit će težak i neizvjestan, za to će biti potrebno, osim reda, rada i organizovanosti, i mnogo novca za kvalitetna pojačanja, kojeg istina za sada nema, ali obzirom da se naš tim, uz par kvalitetnih pojačanja sa strane, najviše oslanja na sopstvene



Juniori OFK Gradina Srebrenik

snage, te uzimajući u obzir da su su juniori OFK Gradine, po treći puta zaredom, pobjednici Prve lige Bosne i Hercegovine - Grupa Sjever, odn. da smo bili i ostali rasadnik talenata, smatramo da se ne trebamo brinuti za budućnost Gradine.